

I CONTIGNÛTS DAL DOCUMENT A VIGNARAN PRESENTÂTS INTUNE CONFERENCE STAMPE LUNIS AI 22 DI MARÇ A UDIN, TE SEDE DE VITE CATHOLICHE



La
Universitât
dal Friûl
e je
tra i
promotôrs
dal
document.

Declarazion a pro de 482

Il document, che al à ancje la poie de Arcidiocesi di Udin, al impegn i firmataris a sburtâ par potenziâ la leç 482 di mût di valorizâ lenghis e culturis minorizadis, massime chês de region

E IMPEGNE I FIRMATARIS a sburtâ par potenziâ la leç 482/99 di mût di promovî e valorizâ lis lenghis e lis culturis minorizadis, massime chês de region. Lu dîs a clâr la Declarazion promovude e sottoscrîte di Universitât di Udin, Provincie e Comun di Udin e Comitât pe autonomie e il rilanc dal Friûl, e aprovade ae unanimitât dai presints ae cunvigne «Scuele e amministrazion publiche. I dîs agns de leç 482 su lis comunitâts linguistichis di Italie», inmaneade, ai 14 di Dicembar dal an stât a palaç Antonini a Udin, pal decim aniversari de aprovazion de leç 482/99 su la tutele des minorancis linguistichis storichis dal Centri internazionâl sul plurilinguism de Universitât di Udin dutun cul assessorât regionâl ae Culture. Tra chei che a àn dât la poie al document, si ricuardin la Arcidiocesi di Udin, il Comitât 482, la Societât filologjiche furlane, l'Istitut ladin furlan «Pre Checo Placerean» e lis associazions slovenis.

I contignûts de Declarazion, dutun cuntune propueste di gnovis «Normis di atuazion» dal Statût de Region e di bêçs pe plene atuazion de leç 482, a vignaran presentâts lunis ai 22 di Març, aes 11 di matine, li de sede de Vite Catholiche, in vie Trep 5/B a Udin. In ché ocasion, la Declarazion e vignarà dade ai parlamentârs e europarlamentârs

de region, e ai components de Comission paritetiche Stât/Regjon presints.

Te Declarazion si sotlinie la impuartance de leç 482 tant che strument pe valorizazion des lenghis e des culturis di popolazions diviersis, tra chestis chês che a fevelin il furlan, e il so jessi in armonie cul articul 6 de Costituzion taliane e cui principis pandûts di organisims europeans e internazionâi; la diminuzion progressive dai fonts pe sô atuazion (vuê a son un cuint di chei che a jerin sul prin) che e contraste cul articul 6 de Costituzion taliane. Si ricuarde che l'articul 3 dal Statût di autonomie de Regjon al ricognòs paritât di dirits e di tratament a ducj i citadins, cualsei che al sedi il grup linguistiche che a apartegnin, cu la protezion des respetivis carateristichis etnichis e linguistichis.

Po si ricuarde la sentence de Cort Costituzionâl (n. 159 dal 2009) li che si dîs che la lenghe furlane «e je un element di identitât individuâl e coletive di impuartance basilâr» e che al è impuartant garantî «il dirit a doprâ la lenghe tes relations istituzionâls, il dirit ae istruzion ancje te lenghe minoritarie, il sostegn ae culture de minorance». Si marce che ché sentence e à mostrât tal articul 65 dal Statût di autonomie la vie («cun decretis legislatîfs, sintude une Comission parite-

tiche di sis membrs, trê nomenâts dal Guvier e trê dal Consei regionâl») par otignî une disipline organiche de tutele de lenghe e culture furlane, tant che altris minorancis linguistichis.

Si ricuarde ancje che la presince des minorancis linguistichis slovene, furlane e todesce, ricognossudis de 482, e je une des resons di fonde de specialitât regionâl e une ricjece pal patrimoni linguistic e culturâl de Republiche taliane che al à bisugne di struments di tutele eficacs.

Su la fonde di chestis, e altris considerazions, i firmataris dal document si impegnin a sostignî il potenziament de leç 482/99, di mût «che e sedi buine di sigurâ finanziaments adeguâts par promovî e valorizâ lis lenghis e lis culturis minoritariis, massime la lenghe furlane e lis altris lenghis de region Friûl-Vignesie Julie» e «a assegnâ ae ativitât de Comission paritetiche Stât/Regjon, in sede di atuazion dal articul 3 dal Statût di autonomie e daûr dal percors mostrât te sentence de Cort Costituzionâl, di cjatâ ogni dispizion ritignude juste par rivâ a une moderne tutele de lenghe furlane e des altris lenghis minoritariis de region tant che materie fondamentâl pe Regjon tai setôrs de Universitât, de comunicazion istituzionâl e te pubblicitât dai ats destinâts ae regjon, de toponomastiche, te suaze des programazions radiofonichis e televisivis, ancje dal servizi public radiotelevisif, de istruzion».

ERIKA ADAMI